

禮記集說

(33021)

禮 記 集 說
冊 八

版權所有翻印必究

中華民國二十四年六月初版

本書紙張售價二角

每部定價大洋貳元捌角

外埠酌加運費隨費

集 說 者

莊 有 可

發 行 人

王 雲 五
上海河南路

印 刷 所

商 務 印 書 館
上海河南路

發 行 所

商 務 印 書 館
上海及各埠

禮記卷三十三

莊有可集

緇衣

此篇公孫尼子作因篇中有好賢如緇衣句因名

子言之曰爲上易事也爲下易知也則刑不煩矣

君仁則易事臣忠則易知否則上將淫刑以逞而下亦多懷姦罔上之獄也

子曰好賢如緇衣惡惡如巷伯則爵不濫而民作愿刑不試而民咸服大雅曰儀刑文王萬國作孚

鄭武公好賢作緇衣詩以禮賢寺人傷於讒作巷伯詩以刺讒其好惡皆誠切之至也作興也咸感也儀擬也刑法也言緇衣

卷伯之好惡得正一出於誠即文王之德所以化天下也故又引詩以明之邦作國避漢諱也

子曰夫民教之以德齊之以禮則民有格心教之以政齊之以刑則民有遜心故君民者子以愛之則民親之信以結之則民不倍恭以涖之則民有孫心甫刑曰苗民匪用命制以刑惟作五虐之刑曰法是以民有惡德而遂絕其世也

格來也感而來之也遜逃避也謂苟免也子愛性也信結情也恭涖躬行也孫順也甫刑即呂刑也命帝命也今作靈蓋師授各異製造作也絕世無後也

子曰下之事上也不從其所令從其所行上好是物下必有甚者

矣故上之所好惡不可不慎也是民之表也

民之從君從所好惡如影逐表也

子曰禹立三年百姓以仁遂焉豈必盡仁詩云赫赫師尹民具爾瞻甫刑曰一人有慶兆民賴之大雅曰成王之孚下土之式

遂暢達也言豈百姓盡能由仁禹所化也三引詩書皆言下之視法由於上也

子曰上好仁則下之爲仁爭先人故長民者章志貞教尊仁以子愛百姓民致行己以說其上矣詩云有棣德行四國順之

章明也貞正也民致行己民之行皆盡己也棣直大也詩作覺子曰王言如絲其出如綸王言如綸其出如綍故大人不倡游言

可言也不可行君子弗言也可行也不可言君子弗行也則民言不危行而行不危言矣詩云淑慎爾止不僭于儀

綸綬也大於絲綉大索也又大於綸言其端甚微其出則甚大也游浮也不可用之言也可言不可行如老莊之志於上古是也可行不可言如北宮之女不嫁以養父母陽城兄弟相愛而終身不娶是也危過高而不相顧也弗言弗行則庶幾言顧行而行顧言矣

子曰君子道人以言而禁人以行故言必慮其所終而行必稽其所敝則民謹於言而慎於行詩云慎爾出話敬爾威儀大雅曰穆穆文王於緝熙敬止

道人以言以誥誓曉諭之也禁人以行身為之法民自不敢為
非也言雖善必慮其所終終不可行如諸子之說淫其終有所
偏也行雖善必考其所敝敝則為害如為我兼愛至於無父無
君其敝不可勝言也

子曰長民者衣服不貳從容有常以齊其民則民德壹詩云彼都
人士狐裘黃黃其容不改出言有章行歸于周萬民所望
服其服則文以君子之容故其效至民德歸厚也

子曰為上可望而知也為下可述而志也則君不疑於其臣而臣
不惑於其君矣尹吉曰惟尹躬及湯咸有一德詩云淑人君子其
儀不忒

可望而知謂貌不藏情即易事也可述而志謂極誠奉上可敘述而筆之於書即易知也尹吉祥後

子曰有國家者章善癯惡以示民厚則民情不貳詩云靖共爾位好是正直

善唐石經作義陸氏釋文云章義如字尚書作善按尚書偽古文也唐時猶作義宋刻本始據偽書改善不可從癯病也厚猶專也明義以病惡則民皆知去惡而徙義以專於為義故民情一也

子曰上人疑則百姓惑下難知則君長勞故君民者章好以示民俗慎惡以御民之淫則民不惑矣臣儀行不重辭不援其所不及

不煩其所不知則君不勞矣詩云上帝板板下民卒瘁小雅曰匪其止共維王之邛

疑者好惡不順人情則難事故百姓惑也難知姦偽莫測也難知則難使故君長勞也御猶閑也淫過也儀擬也行所當為之事也儀行則詳慎於所行不重詞不以虛言為尚也援攀求也不及己才之所不及也煩猶累也不知君所不當知者有司之末務不敢以煩君聽也上帝喻君也板板如木之分散而瑣碎也卒盡也邛勞也

子曰政之不行也教之不成也爵祿不足勸也刑罰不足恥也故上不可以褻刑而輕爵康誥曰敬明乃罰甫刑曰播刑之不迪

上言好惡此言刑爵者好惡本諸心必形諸政教而刑爵從之也迪道也不迪迪也語助詞

子曰大臣不親百姓不寧則忠敬不足而富貴已過也大臣不治而邇臣比矣故大臣不可不敬也是民之表也邇臣不可不慎也是民之道也君母以小謀大母以遠言近母以內圖外則大臣不怨邇臣不疾而遠臣不敵矣業公之顧命曰母以小謀敗大作母以嬖御人疾莊后母以嬖御士疾莊士大夫卿士

親信用也忠謂臣敬謂君已過太甚也富貴已過謂君臣驕侈太甚也治堪其任也大臣非君子不能勝其任則必与近臣朋比以欺君也述臣凡侍御僕從之臣表者民所望也道者民所

從也小臣謀大臣則大臣怨不以矣遠臣聞近臣則近臣妬遠臣矣內之寵臣圖在外宦力之士則外臣之賢勞壅蔽而不知矣葉公楚葉公子高也顧命臨終遺命也小謀小臣之謀大作大臣所為國之大事也嬖御人愛妾也疾妬忌也莊后嫡夫人也嬖御士幸臣也莊士大夫卿士朝臣之忠正者

子曰大人不親其所賢而信其所賤民是以親失而教是以煩詩云彼求我則如不我得執我仇仇亦不我力君陳曰未見聖若己弗克見既見聖亦不克由聖
端人正士非不知其賢也以其防己之欲而不能親便僻側媚非不知其賤也以其便己之私而遂信之此民所以失其親上

之心而視教令為具文也則以為法也君陳尚書逸篇名

子曰小人溺於水君子溺於口大人溺於民皆在其所褻也夫水
近於人而溺人德易狎而難親也易以溺人口費而煩易出難悔
易以溺人夫民閉於人而有鄙心可敬不可慢易以溺人故君子
不可以不慎也大甲曰毋越厥命以自覆也若虞機張往省括于
厥度則釋兌命曰惟口起羞惟甲冑起兵惟衣裳在笥惟干戈省
厥躬大甲曰天作孽可違也自作孽不可以逭尹吉曰惟尹躬天
見于西邑夏自周有終相亦惟終

溺覆沒不能自振也德水之性也費所用廣也煩不能節也人
謂有司百官閉壅也閉於人其情為人所閉不能上達也鄙心

意見淺陋也有鄙心則易騰怨謗也大甲旣命皆逸書越歷也
覆敗也虞虞人也機弩牙也度所擬射者羞辱也多言則召辱
耀兵則召寇筭衣箱也在筭不可妄費重命服也干戈以討有
罪省厥躬必已無僭忒而後可責人也違避也逋逃也此又言
尹吉蓋尹氏吉字為周尹吉甫也躬其先祖或字也見如覲見
之見夏大也如區夏華夏之夏周岐周也言吉之先尹躬天意
顯見之於西周盛大之時也有終如詩言有初有終也自周有
終者當周室初興而尹躬即令終有後也相助也相亦惟終謂
助其後人亦皆有終也然則前所引及湯之湯蓋亦躬之後吉
之先也此篇所引有葉公南人原不止詩書易耳

子曰民以君爲心君以民爲體心莊則體舒心肅則容敬心好之
身必安之君好之民必欲之心以體全亦以體傷君以民存亦以
民亡詩云昔吾有先正其言明且清國家以寧都邑以成庶民以
生誰能秉國成不自爲正卒勞百姓君雅曰夏日暑雨小民惟曰
怨資冬祈寒小民亦惟曰怨

此言君民相須治民之道不可不慎也詩逸詩先正先君長之
爲人所取正者不自爲正不能正己也君雅鄭氏以爲君牙亦
逸書也資藉也祈求也冬不寒則陽氣洩春且爲災故藉冬求
寒以斂之時非寒暑不成而民猶苦之而怨極言治民之不易
也

子曰下之事上也身不正言不信則義不壹行無類也

義者事之宜也不壹是無義也類似也無類是無行也立身不正出言不信有如此而望君之信從豈可得哉

子曰言有物而行有格也是以生則不可奪志死則不可奪名故君子多聞賢而守之多志賢而親之精知略而行之君陳曰出入自爾師虞庶言同詩云淑人君子其儀一也

物謂事驗也格謂成式也質證也志記也聞於耳者或慮不實志於古者或不宜於今故必皆有證而可守可親也精知知之至也略舉其要也自由也師眾也虞度也庶言同者庶幾所言同於眾也一不二也引君陳證多聞多志引詩證精知也

子曰唯君子能好其正小人毒其正故君子之朋友有鄉其惡有方是故邇者不惑而遠者不疑也詩云君子好仇

毒害也言君子小人非特其身之正不正異也其所好所惡又各不同故所友所惡又不可不慎也好善也仇匹也此引詩亦斷章取義

子曰輕絕貧賤而重絕富貴則好賢不堅而惡惡不著也人雖曰不利吾不信也詩云朋友攸攝攝以威儀

利貪利也攝檢束也攝以威儀重在責善不可以貧賤富貴分輕重也

子曰私惠不歸德君子不自留焉詩云人之好我示我周行

私惠以私意相厚也不歸德不以德義為主也留愛也

子曰苟有車必見其軾苟有衣必見其敝人苟或言之必聞其聲苟或行之必見其成葛覃曰服之無射

見軾以車始成言從前言也見敝以衣必敝言從後言也服猶事也無義同毋射厭也言人當終身以慎言慎行為事不可厭怠也亦斷章取義

子曰言從而行之則言不可飾也行從而言之則行不可飾也故君子寡言而行以成其信則民不得大其美而小其惡詩云白圭之玷尚可磨也斯言之玷不可爲也小雅曰允也君子展也大成君奭曰在昔上帝周田觀文王之德其集大命于厥躬